




崔舍人西垣類藁





叢書集成


初編

主編者
王雲五

商務印書館發行



藁類垣西人舍崔



3 0645 1762 0

著詩敦崔

本館叢書集成初編所選佚存
叢書及粵雅堂叢書皆收有此
書粵雅覆刊佚存故據佚存本
排印並錄粵雅本所載伍崇曜
跋於後

崔舍人西垣類藁卷第一

王希呂知紹興府

稽山奧壤。浙水名邦。地接浩繁。夙倚藩維之重。民罹菑害。今勤憂顧之懷。具官王希呂。識慮純誠。天至獨開忠義之圖。俊辯風馳。自詭功名之會。寔發舒於素蘊。遂登冠於近聯。久歷。遇爰念近畿之地。方深艱食之虞。展開貸捐。悉無遺力。矜存惠養。正在得人。宜深體於焦勞。尙恪勤於綏撫。惟詳密可以究民隱。惟寬和可以盡下情。佇輯顯庸。卽圖懋賞。可。

鄭丙除吏部尙書

天官任重。綜會羣才。常伯班高。密鄰二府。朕深厭容容之弊。樂聞諤諤之風。儀圖正臣。領袖法從。具官鄭丙。志剛而弗惑。學博而有原。正色不回。凜凜端朝之望。至誠無隱。拳拳迄膝之陳。察其特立而獨行。常以深嘉而屢嘆。眷言銓選。宜屬老成。惟亮直必不以法而從人。惟公明必不以權而付吏。揚清激濁。方觀綱紀之張。陳善閉邪。更賴謀猷之告。勉堅素守。益劭遠下。原。

朕稽古訓以建官。酌公言而立政。稟承出於西省。既克謹於幾微之先。審閱付於東臺。又相濟以可否之論。夙重茲任。竄惟其賢。具官施師點。學造深淳。器函夷雅。清規亮節。凜松柏之後彫。原實美名。顯圭璋之



50408

2:2000

特達自躋榮於禁路。卽演潤於詞垣。高文舉經術之華。宏論達國家之體。既淹歲籥。宜進位班。庶事施置。有未便於民。羣才選除。有未孚於衆。爾悉予告。予皆爾從。當消患於冥冥。豈矜功於赫赫。勉殫忠蘊。茂對亨嘉可。

木待問除中書舍人

政令出於中書。訓辭行於內史。必識通今事。乃能裁若否之宜。必文追古風。方足擅坦明之制。得於已試。命以爲真。具官木待問。智識澹長。風規邃遠。英聲茂實。早騫藝苑之華。安步徐行。徧極儒林之選。曩記言於左陛。旋攝直於西垣。文詞鼓天下之心。議論發胸中之蘊。宜從輿望。遂正近聯。四禁行書。方重高華之地。五花判事。益觀潤色之長。可。

儒林郎劉植降一官

國家法令昭若日星。有官君子。尤當循守。爾乃戾法以徇其私。罰可逃乎。可。

從義郎孫惠義降一官

縣令於民最親。爾居其官。敢肆殘酷。不有顯罰。曷厲其餘。可。

芮輝兼侍讀

朕泛觀載籍。夷考名臣。越在李唐。深嘉陸贄。雖忠規挺挺。凜後世之未亡。願諫疏拳拳。慨當時之不遇。肆疇近列。俾闡遺文。固將廣一己之聰明。抑亦發九原之亮直。具官芮輝。性資宏毅。德宇淵純。奧學英詞。蚤

著士林之譽。昌言正論。晚高禁路之聲。宜從清燕之遊。用究前賢之蘊。摘其精要。爲我指陳。金必賴於良工。始得範模之正。方雖傳於往古。固多藥石之良。可。

武功大夫謝純孝降三官放罷

廉恥國之所甚重。貪污法之所不容。爾資稟凡庸。弗紹厥美。護其宿過。寘在右班。位序高華。不爲不遇。繕治器械。朕所注懷。俾爾典臨。略無勞効。而敢黷貨冒沒。肆其豕心。徹于聽聞。何敢佚罰。雖鑄累秩。尙屈蘇章。宜知寬恩。痛自懲省。可。

韋訊致仕

朕娛侍親庭。優隆戚畹。望濯龍之車馬。稍闔冲規。挂神武之衣冠。忽披忱請。重違雅志。亟下褒書。具官韋訊。制行端良。稟資和裕。高門有奕。靡矜世胄之華。令德無疵。自迪儒風之美。比聞假告。方切眷懷。尙須勿藥之期。遽上告歸之奏。念其確至。畀以休閒。簪紱趨朝。雖嘆儀刑之遠。丘樊佚老。終膺福祉之長。可。

張顯功轉防禦使

帶干將。佩弧矢。入侍出從。密近左右。其爲恩渥。不同常倫。于解其職。又增秩以寵之。用故事也。爾恭恣敏給。擢在軒墀。左引右隄。周旋惟謹。茲出分於戎務。爰陞寄於軍防。尙服龍光。益圖報効。可。

秉義郎魯安時安陳利害降兩官

朕於聽言。雖草茅之狂。未嘗不容也。爾詭辭汗漫。略無端倪。不黜得乎。可。

章訊贈節度使

聯華四姓。望尤重於親賢。流寵九原。義當隆於恩禮。莫追遺範。爰錫愍章。具官章訊。德宇靖深。器資溫裕。雍容文藝。恂恂樂善之風。蹈履中和。暨暨勞謙之度。還觀懿行。盍享遐齡。方從解紱之高。遽歎移舟之遠。臨朝興愴。念咸畹之彫零。渙爵疏恩。飭邦彝之優厚。宜昇建旆之寵。俾爲告第之光。慰爾杳冥。寄予哀惻。尙祇徽典。永燕幽宮。可。

木待問磨勘轉中大夫制

聯榮兩禁。禮優入侍之臣。會課三銓。法著陟明之典。肆條伐緒。爰錫恩書。具官木待問。德宇凝深。詞華雅健。代言西掖。旣全潤飾之功。論道東宮。更廣見聞之正。寵榮方集。聲問桀高。稽周官大計之書。躋漢爵議臣之序。秩登祿富。當思報稱之圖。言聽計從。正賴忠嘉之益。可。

皇甫倜降官吉州居住制

程尉馭下。必先軍簿之明。李牧饗師。亦取市租之富。爾素稱勇節。自奮戎行。蚤受簡知。荐分委寄。旣不能昭明兵律。俾以肅齊。又不能經理軍須。底于辦給。空閱歲年之久。略無績効之聞。茲覽人言。可逃國典。宜併鑄於官秩。仍就謫於方州。法有至公。固不渝於金石。才無終棄。尙可効於桑榆。可。

趙善俊降直徽猷閣制

朕審重名器。未嘗輕假。爾畏妄人之利口。盜薦牘之虛辭。欲以市恩。忍於罔上。任方面者。願如是乎。降職

示懲。尙爲寬典。宜思循省。毋重悔尤可。

孔楮降兩官制

孔子曰。節用而愛人。未有用節而人不蒙其愛也。爾爲聖人後。曾不知此。聊從薄罰。降秩罷州。歸思聖言。尙亦知恥可。

牟天麟降一官放罷

小寇跳梁。一方被害。爾爲郡貳。義當首公。避事偷安。茲復何賴。免官降秩。庸戒後來可。

王丞相初除封贈三代

曾祖贈太師

朕卜選眞賢。登進宰位。乃一德一心。勸相我國家。則亦惟念流澤之由。褒大顯榮。上及三世。蓋尊尊者。口重善善者。慶長古之道也。具官某。體仁蹈義。飭于口躬。錫祚流光。燕及乃後。今予命以維垣一品之秩。口賁于廟。豈惟示吾尊異元臣之心。抑亦彰未慶源深長。流衍未艾。潛德闕耀。發見有時。以勸天下之爲善。與臣子之顯親。一舉而數美備。豈不休哉可。

曾祖母贈楚國夫人

朕惟國家崇厚士夫。自通籍以上。皆得寵綏其先。其位愈高。其體愈隆。推而上之。至于相臣。遂及三世。而命爵品秩。又皆加異。凡以禮之宜與稱所當然也。具位某氏。柔明端靖。蹈履令規。仁慈惠祥。開相後裔。乃

眷元輔。是惟聞孫。今進登厥位。而不推錫恩寵。以資于幽局。何以昭積善之報。而慰慕遠之心哉。追錫命書。改封全楚。庶其如在。尙克有榮可。

祖封魯國公

積厚者光遠。施隆者享豐。固有高門而俟軒車。乃若植槐而須袞繡。修德在己。責報彼天。殆厥應之信然。何可必之如此。具官某。才周世用。行迪天常。秉節自彊。蚤共高於問望。韜光不曜。晚弗見於功名。委祉後昆。調元台路。肆於柄任之始。念爾陰功之由。詔爵追榮。已極上公之貴。按圖易壤。更新東魯之封。尙體密章。永寧泉室。可。

祖母贈魯國夫人

爵視德以俱崇。禮隨情而始稱。眷惟元輔。方懋遠圖。探尊祖之心。旣加崇於廟室。推齊體之義。爰並下於恩書。具位某氏。秉則淳和。凝資冲靜。柔風懿範。旣克相於有家。厚德陰功。乃大昌於厥後。屬聞孫之登任。知慶澤之由來。位正小君。已疏榮於象服。封開大國。仍易地於龜蒙。尙想營魂。克祗茂典。可。

父封慶國公

臣子之道。忠孝而已。得時行道。旣盡忠於國。原始追遠。必思逮其親。朕旣歷選于衆。得天下之賢。而命之輔相。又推其欲報之心。不愛高官重爵。以崇寵其先。豈非仁之至而義之盡者歟。具官某。宅心澹夷。制行中正。蹈履仁義。弗昌于時。卷藏材猷。全畀其子。今吾丞相佐佑厥辟。勤勞國家。則惟爾義方之教。用能銜

訓象美。底其忠嘉。肆於柄任之始。命以全國美封。告于廟室。豈惟發揚潛德之光。抑亦褒大慶祥之自。沒而不朽。尙榮享爲可。

母封吳國太夫人

朕覽魯侯燕喜之章。想其雍雍怡怡。內外和擇。固常三復興嘆。以爲人臣之遇。旣致位於顯崇。復榮親於孝養。信天下之至樂。無以易也。今吾丞相寅亮元化。辨章萬微。退食委蛇。有母而壽。茲非朕心之寵嘉乎。具位某氏。生稟柔則。動合令儀。信順靖恭。稱內助之正。慈和嚴翼。具聖善之資。果見嗣賢。是陟相位。肆稽彝典。爰易名封。且袞繡拜前。簪紱滿後。俾夫族黨胥慶。知天報之豐。邦國具膺。幸親榮之盛。則惟爾訓。絃之厚。豈不顯哉。可。

妻封越國夫人

朕觀召南之詩。知夫賢人君子。身有爵位。上宣勞於王室。下施澤於國人。其所以夙夜匪懈。克底成績。則亦惟內助之賢。乃有濟也。今予登用一相。儀刑列辟。肆推伉儷之體。併錫褒崇之章。豈非此虛。具位某氏。懿和稟質。溫靖成儀。嬾于德人。動以禮法。爰舉典章之舊。俾新脂澤之封。尙服寵榮。益綏福履。可。

趙介降兩官

朕保民如保赤子。惟恐傷之。爾受命典州。宜知德意。乃剝民以資妄用。不黜可乎。降秩兩階。尙爲輕典。可。曾守約降兩官放罷。

朕甚惡將帥剝下以自豐。爾甫分戎寄，已肆貪心。降秩免官，尙爲寬典。可。

張士份降一資

賦有經常，一豪過之，卽傷吾民。爾撫字無方，刻剝是務。閱實以聞，聊用薄罰。可。

韋潛心降兩資放罷

周官以豬蓄水，以澮寫水。凡蓄水者，正以待旱而灌輸也。爾昧於適宜，幾以召亂。繆戾如此，蒙黜何尤。可。

李椿落致仕除顯謨閣待制知潭州

朕厲精政理，遴選帥藩。念南紀之上游，孰寬予顧。訪東山之故老，強爲我興。具官某，學造誠明，智周貫變。端純簡重，曾不越於宮庭。清粹澹夷，亦無窺其涯涘。曩綴甘泉之從，歷宣外屏之勞。旋據禮以告歸，迄挂冠而厲俗。眷言巨鎮，夙重長沙。藩翰須賢，方當寧周詢之日。丘園亢志，豈長才高臥之時。宜下垂車，卽紆懷綬。仍念分符於遠服，更令峻職於西清。惟風俗周知，當有爲而人服。惟吏民素習，固不令而化行。尙底政成，更勤猷告。可。

江溥除直祕閣

西崑冊府，東觀道山。凡預選掄，莫非俊乂。至於官稱論譏，地重高華。朕今以清名顯職，皆爲勸功之具。非績用卓然，協于輿論，不以輕畀也。爾素推才望，嘗任臺綱。不避當塗，無爽正論。今以使者節，持平一道。乃能以其餘力，審覈邊防。徹于聽聞，良所嘉賞。且身行重湖風波之外，名繫蓬萊雲氣之間。吏民觀望，不亦

美乎。宜思忠勤，益務報稱，可。

沈作賓再任評事

廷尉有平，朕所選擇。凡其以稱任聞者，不遽易之也。爾庇職有年，議法無枉，爰俾因任，尙究所長，可。

潘師旦罷閣職轉一官

帝宸二閣，職近地親，肆推懋恩，率用優比。爾久恭乃事，今解厥司，眷言勞勤，宜有褒異。且一官之賞，朕亦甚吝，毋曰持例可得而不思報哉，可。

吏部員外郎蘇詡陞郎中

文昌諸郎，俱世高選，校勞定位，纖悉不差。蓋重其任也。爾名臣之後，詳練靖嘉，列屬三銓，甄序惟允。今推次閔閱，宜在正員之序，不旣寵乎？位班雖升，職任不易。夙夜匪懈，迄究爾庸，可。

何杞特降兩官

監臨虧失，國有彝章。爾掎削紛紜，幾以逃責。獨不念無辜之民乎？帥臣以聞，不可無罰，可。

張子顏降敷文閣直學士提舉江州太平興國官

朕厲精政體，勤恤黎元。比聞近輔之邦，適爽順成之望。亟下命令，悉捐賦輸，宣吾德心。屬在帥守，具官某。蚤登禁近，屢守藩方。念其踐歷之多，寄以撫綏之任。方矜存流宥，屢頒漢詔之寬。乃督迫催科，靡念越人之瘠。屬披臺劾，已釋郡章。宜降職於清班，俾奉祠於外館。尙思前失，益勉後圖，可。

內侍寄資武功大夫張安祚寄資武義大夫謝仔與轉歸吏部

內侍之官秩至東班供奉則有寄資逮歸銓曹乃畀外任此舊典也爾服勞親近厲志端勤既躋宮省之司宜正武階之秩雖循常比實出殊私且恭則寡過密則遠嫌可不勉哉可

宇文紹奕敍官

國家黜幽甄敍有法未嘗以一眚棄材也爾向坐簡劾既閱歲年應于常科還爾舊物盍思所以報此哉可

廖遂特降一官

摺紳庸行無越廉隅審如章聞爾何甚已尙緣去斥寧不究窮鑄官一階當識寬宥可

楊丙降一資放罷

職爲司屬率教令趨期會宜也爾緩不虔又以計去寧無責乎可

崔舍人西垣類藁卷第二

劉堯咨該人使到闕應奉十番特與遙郡上轉行一官

朱華上閣位序高榮凡列職其間積其伐緒皆有以優異之示厚恩也爾奮由將閔進服宸庭歲時既多勞績是著今俾疊上二秩之賞陞列遙團不既寵乎恭以承事恪以守業率履不懈圖究爾能可

孟俊特降一官

東南諸將碁布昕分鈐制之官所望忠實爾紀律素弛廉級已夷肆爲詭辭溢見章奏鑄官一秩可不戒乎可

魏泳降兩資放罷

穀粟無征法也況當救荒之日乎爾背違德意苛擾商舟免官黜資聊示薄責可

趙粹中落職

百年去殺政常出於寬平三宥致刑事當先於清審具官某頃由法從俾典方州銳陳郵置之姦顯正市闕之戮既更累歲乃露幽冤五聽有孚何偶乖於克允一成不變遂濫及於無辜莫追祝網之寬尙想沈泉之痛究觀厥實駭動予衷死者不生懲之奚益姑盡鑄於乃職庶具警於攸司祇服恩容勉圖報効可

鄧從訓職事有勞特與遙郡上轉行一官

朕欽修孝養。祇奉慈庭。凡給侍左右。苟有勞能。未嘗不優賞而昭勸之也。具官某。愿感筋躬。恭恪承事。既乃歲籥。良協眷懷。宜進序於遙團。用增華於內列。維忠維勤。夙夜不解。圖所以稱朕意者。可不勉哉。可。

雷世方降一官

將帥之道。維公與廉。乃可服衆。自昔所記。市租輸莫府。賞賜入軍中。凡皆一毫不私也。況敢奢侈以自奉乎。爾用公財。造私舟。得於風聞。事有實狀。鑄官一等。聊警乃心。尙知戒哉。可。

王孝通特降一資

綱運之事。屬之搢紳。猶有以侵移聞者。尙誰使乎。黜官一資。聊示薄罰。可。

張適朱傑各特降兩官放罷

黎民荐飢。荒政畢舉。一時乏事之吏。咸用峻典。朕爲赤子計者重也。爾等各負曠責。具形劾章。鑄秩免官。理不容已。可。

辛棄疾落職罷新任

淫風殉貨。義存商訓之明。酷吏知名。事匪漢朝之美。豈意公平之世。乃聞殘黷之稱。罪旣發舒。理難容貸。爾乘時自奮。慕義來歸。固嘗推以誠心。亦旣委之方面。曾微報効。遽暴過愆。肆厥貪求。指公財爲囊橐。敢於誅艾。視赤子猶草菅。憑陵上司。締結同類。憤形中外之士。怨積江湖之民。方廣賂遺。庶消譏議。負予及此。爲爾悵然。尙念間關向舊之初心。迄用平恕。隆寬之中典。悉鑄祕職。併解新官。宜認前非。益圖後効。可。

錢愷守本官致仕

朕惟行尊賢穆恩厚昭陵舊館淒涼。悵穠華之已遠。高閣赫奕。望喬木之猶存。肆乃後人。見茲耆老。□□某賦資淳壹。秉誼直溫。習見稔聞。多前人之風度。侃言循行。守君子之宮庭。方圖畀於恩章。遽願還於官政。抱誠既切。抗志莫回。沁水名園。應動襟懷之遠。都門祖帳。遂全名節之高。勉服寵光。茂終慶譽。可。

薛舜臣特降一資

刑獄朕所甚重。爾爲縣令。荒怠厥事。乃使狴牢之內。有死於淫酷者。一資之黜。豈足償寃。當體寬容。尙知愧畏。可。

錢愷贈節度使

朕敦厚風化。優崇族親。角東路之中。甫遂垂車之志。薄西山之景。遽聞易簣之言。具官某。風矩詳華。才資清邁。訪建武功臣之世。盛矣無窮。閱長安戚里之家。歸然獨在。尙須耆艾。足寄典刑。駭遺書之上聞。悼故老之凋盡。念此感慨。優其寵榮。絳節先塗。莫致生前之遇。篆章書柩。聊爲沒後之光。諒爾沈冥。知予傷惻。可。

魏庭瓚董壽祺應奉金國人使到闕及一十番與轉一官

周旋軒墀。贊相賓客。其責皆非輕也。爾承事恪勤。詔禮安裕。閱歲既久。積勞當遷。一官之賞。尙承敬哉。可。

楊思濟特降一官

小民乘饑譁聚有訴。鎮以安靜徐爲辯詳。宜也。爾惑亂失措。可不責乎。可。

王定國特降一官

天下之士會於銓曹。里居官歷必有實。乃可攷也。爾遠通戶籍。私謁吏胥。閱實以聞。不可無罰。可。

崔亮捕賊沈師等陣亡特與贈四官

共武之臣。所資於忠力。死綏之節。當厚於恩章。爾策略敏明。器懷沈銳。久領師干之寄。適承名捕之書。匹馬直趨。庶成功於必取。妖弧匿發。偶殞命於不虞。莫歸先軫之元。徒負班超之願。優加卹典。驟越彝章。尙發予懷。慰忠魂於地下。亦令爾士激義氣於行間。可。

耿秉降一官

朕憂民之飢。由己飢之。凡捐財發粟。皆以拯民也。爾夙負材稱。尤高郡選。適因匱乏。遂有轉移。雖心乎奉公。殆與朕本指良異。可無責乎。尙緣荒政。已著勞庸。薄罰示懲。餘毋胥効。可。

趙汝慧回授贈母

仁治之朝。凡以親請者。朕未嘗不致其厚也。爾子願馳一秩。追賚九原。則其賢亦可知矣。爰頒明綸。俾遂素志。幽爽未泯。得無慰哉。可。

劉焯落集英殿修撰

朝廷清明。公道昭達。威用峻罰。酌從輿言。爾蚤列雋英。素高議論。出於選擢。付以蕃宣。今言者歷數過愆。

置在窮奇之目。鋪觀反復。迹狀燦然。噫。使朕賞不當功。罰不當罪。皆爾私意變亂所致。可不責耶。盡鑄寵名。少謝衆志。祇予寬典。尙省厥尤可。

廖遵降一資

外臺之臣。寄朕耳目。所以取成而制賞罰者也。爾前使遐方。嘗上重劾。逮茲覆視。見乃橫誣。噫。使予施峻罰於無辜。抑何誤耶。降秩一階。尙爲寬典。維明克審。則免後尤可。

曾寅降一官

王畿之內。纖悉必聞。爾爲小吏。奉職不謹。閱實有狀。聊用薄罰可。

趙伯驢落階官

右班至正任。恩禮重矣。朕未嘗輕以假人也。比承慈訓。褒厚宗盟。乃下贊書。用成德美。爾稟資和裕。履行端純。總近甸之軍符。司外臺之臬事。久于任使。見乃勤勞。茲用推錫恩章。進于扞防之秩。不旣顯哉。服命數之殊常。思寵名之長守。惟謙惟畏。是稱所蒙可。

趙不恭贈左領軍衛將軍

朕惟祖宗本支。蕃衍百世。間聞淪喪。有足悼傷。不有厚典。何以寄予恤乎。爾邦族之良。淳和孝友。曷嗇其子。乃弗永年。朕用不釋于懷。命以領衛之秩。賁于九原。哀榮有終。恩義俱盡。尙有知者。亦克享哉可。

林和林賜各轉一官

頑兇輕命出沒溟波。殘擾善良。寢以稽捕。爾等履危蹈險。禽獲無遺。顯伏重刑。海氣明靜。咸進官秩。尙知報哉。可。

趙不諱換率府副率

朕優崇近親。敦厚美俗。間者。下升等之詔。所以壯宗盟而華班序也。爾端純靖共。蹈履無失。宜易環列。俾參昕朝。尙承敬哉。可。

張子震補承信郎

內省去職。聽奏未仕者二人。非舊制也。用是官爾。宜敬以承。可。

姜棫應奉人使到闕及一十番與轉一官

端宸二閣。右列高選也。爾敏給靖恭。祇事維久。贊道賓客。禮無闕違。命進官秩。尙思報哉。可。

杜沂除閣門祇候

朕惟昭憲皇后之家。寢鬱弗昌。明發有懷。爲之惕然。爾純謹和雅。自有前光。宸閣清華。命以庇職。豈不宜哉。可。

王珪降一資

郡獄有冤。至於濫殺。究其蔽斷。初不至斯。固有任其咎者矣。爾得無薄罰乎。可。

施師點奉使回程特轉一官

禮樂光華。方被張旆之遺。山川跋履。又觀濡轡之旋。具官某。德器純深。才資高邁。駕一乘之傳。不憚于行。道二國之言。罔違於禮。肆疇褒典。俾進文階。維關河感槩之情。暨原隰咨詢之實。尙殫猷告。茂對恩光。可。

鄒詡副使回程特轉一官

玉帛往來。內外和樂。于時拜五善之詩。奉萬里之使。亦人臣之至榮也。爾奮迹巍科。典教右學。才業之茂。有達朕聞。選以輔行。迄於成禮。勞還進秩。尙承敬哉。可。

張大聲孫孜特降一資

朕救災卹患。所賴羣力。今使者上不職之吏。宜有薄罰。可。

范珣武劉銑陳拱夏之禮各降兩官

羽林之兵。有干等級。是必紀律素弛。恩威不孚。而致此也。豈特逐捕弗謹爲罪乎。偏裨而下。降黜以差。尙警其餘。善撫吾士。可。

張瓘降一官放罷

畔官離次。國典有常。爾爲貳郡。宜知職守。乃翮然自如。肆己之便。尙有法乎。可。

張偉降兩官

一夫肆兇。干犯軍律。玩弛不謹。宜有自來。凡預典臨。皆被黜罰。爾職雖下。可得免乎。可。

馬希古趙友諒各轉一官

古者醫政。視勞制食。所以引人之進於藝也。爾執伎有稱。服勤維久。肆稽功緒。俾陟官階。維謹以恪。尙益勉哉。可。

趙鞏施枹各轉一資

近臣出疆。體優事重。凡其選置。行與居者。皆被勞還之賞。不旣寵乎。可。

朱熙績降一資

鄉郡有飢。義當救恤。乘時邀利。是誠何心。雖爾不足以責此。遠令鼓衆。可無罰乎。可。

郭杲轉遙刺

刺史古官也。漢制秩二千石。宣詔牧民。乃古方伯之任。今列于勇爵。號爲顯崇。雖在遙寄。亦不輕予。爾分提戎戍。安鎮邊陲。攝領帥藩。積更歲籥。疇其勞効。錫以寵光。衛上盡忠。撫士盡愛。圖所報稱。可不勉哉。可。

李師信補挈壺正

疇人之官。序于爵品。爾服初命。宜謹厥司。可。

楊樾李溫各轉一官

祗奉賓客。咸有優恩。所以勸人之謹於事也。爾以積勞。應于遷令。尙敬承哉。可。

王蘭兼崇政殿說書

朕從容清燕。延見儒英。講道先聖之遺書。誦說前賢之名論。信天下之樂。無以加也。自非直亮多聞。古之

所謂三益者。尙誰居乎。爾氣節高邁。學問淵純。中立獨行。無所回曲。擢在臺察。斷由朕心。風稜言言。不善知懼。今引以自近。列于講席。豈徒望爾於分章析句之間哉。啓告利病。分別正邪。知無不言。是乃報稱。可。

韓敏中降一官

天下財賦。灌輸中都。今民曹上稽遠之狀。罰難但已。繼官示責。尙敬承哉。可。

曾惴降兩資

縣有戎兵。將以警盜。爾爲令亡狀。漫不知卹。何以責其力乎。可。

趙詠之回授封母

朕以孝理天下。凡搢紳之以親請者。未嘗不曲從其欲也。爾子願貶已秩。圖報母慈。推錫命封。資于泉室。可。

右宋槧玉堂類藁二十卷。西垣類藁二卷。南宋崔敦詩所著。附錄一卷。乃係其歷官制誥及祭文挽詞。按宋史敦詩無傳。據姓譜及其墓銘。敦詩字大雅。常熟人。紹興進士。官至中書舍人。性謹厚。知大體。所陳剴切。爲孝宗所器許。有文集二十卷。奏議五卷。制藁二十二卷。又著制海監韻等書。就司馬公通鑑。舉論每代得失正邪。成要覽六十卷。以奏御。帝命更定呂東萊文鑑。其增損去留。率有意義。又按宋藝文志所載。周必大玉堂西垣二藁。二十二卷。當卽崔此藁。而脫脫誤以爲周也。其他諸家書目。皆不著錄。獨葉盛列之策竹堂目錄。則知明氏中葉。其書猶存也。至於乾隆四庫目錄不復及。則或者已亡矣。此本古色鬱然。其爲當初原板。無可疑焉。首有金澤文庫印記。上杉氏舊藏也。凡宋刻傳者。明清猶爲罕遘。況於萬里之外。其可不寶愛乎。詳其編纂。不過制誥口宣批答及青詞致語等。蓋所謂制藁二十二卷者歟。其他奏議文集。知大體而剴切者。今皆不可見。爲可惜已。栗山柴邦彥跋。

彙者柴彥輔獲宋槧玉堂類藁。與余商摧爲之跋。余時借觀。將欲活字印出。彥輔亦慫慂之。今刷印方訖。則彥輔逝矣。不及見也。仍附柴跋。併志其憾。丁卯十又二月中泮八日天瀑山人識。

右玉堂類稿二十卷。西垣類稿二卷。宋舍人崔敦詩大雅撰。是書四庫提要未著錄。此爲日本柴邦彥所刻。敦詩事蹟具見柴跋中。茲不再贅。惟柴跋云。宋藝文志所載周必大玉堂西垣二藁二十二卷。當卽崔此藁。而脫誤以爲周益公。此則大謬。考宋人以玉堂西垣名集者。不知凡幾。若張方平有玉堂集。元絳有玉堂詩。王應麟有玉堂類藁。宋敏求有西垣制詞。鄧綰有西垣制集。曾肇有西垣集。豈皆可指爲崔所作耶。考大雅在宋時才名甚盛。與其兄敦禮有競爽之稱。焦竑國史經籍志有敦禮集二十卷。今不可見。惟宮教集十二卷。尙著錄於四庫提要中。內有進重刪呂祖謙所編文鑑劄子一篇。提要據李心傳朝野雜記定爲敦禮之弟敦詩所作。而此編顧無之。或大雅當別有文集歟。又朱子語類有論及大雅刪定文鑑事。王伯厚困學紀聞亦采其草史直翁制。是宋人固極推重之。然歲月傑池。遺作幾於散佚。觀近人彭文勤公宋四六選。於大雅所作之制誥。一字不錄。則亦未見此書矣。其文雍容和雅。頗足與洪景廬汪淨溪相頡頏。錄存之。亦足備宋人文集之一種也。同治壬戌立秋後二日。南海伍崇曜謹跋。



編主五雲王

編初成集書叢

藝類垣西人舍崔

中華民國二十五年十二月初版

著者 崔敦詩

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

(本書校對者曹鈞石)

詩

六二〇五上

翁



3
4
2000